

خَطِ اوّلِ پوُلُسِ بَلَدِه ايمانداراي

تِسالونِيكي

پيشگفتار

امي خطِ بَلَدِه ايمانداراي شارِ تِسالونِيكي نوشته شُدِه.
تِسالونِيكي پايتختِ ولايتِ مَقَدونيه بُوَد و مَقَدونيه يكي از
ولايت هاي امپراطوري رُوم.

پوُلُس وختِيكه شارِ فيليپي ره ايله كده دَ تِسالونِيكي رفت، او
مردُم ازونجی ره دعوت كد كه دَ مسيح ايمان بيره و ازوا يگ
جماعت جور كد، مگم گلو وخت تير نَشُد كه يهوديا قد ازو
مُخالفَت ره شروع كد. اونا وختي ديد كه كار اعلان كدون
خوشخبری پوُلُس دَ مينكلِ مردُمای غير يهود دَ كاميابی پيش
موره، قار ازوا باله آمد و اونا بخيلي ره شروع كد، چون گلو
مردُمای غير يهود پيش ازو دَ يهوديت دلچسپی دشت.
مُخالفَت ازوا دَ اندازه گلو شُد كه پوُلُس مجبور شُد

تَسالونیکي ره ايله کنه و دَ شارِ بیریه بوره. بعد از یگ مُدَت
وختیکه پولس دَ شارِ قُرنتس رفت، همکار شی تیموتائوس
بلده ازو دَ باره ایماندارای تَسالونیکي خبر ریی کد. مُطابق
خبر تیموتائوس، دَ مینکل ایماندارای تَسالونیکي دَ باره پس
آمدون مسیح سوال پیدا شُد. امزو خاطر پولس لازم دید که
موضوع ره بلده ازوا بیان کنه.

پولس دَ امزی خط بلده خبرِ خوب که دَ باره ایمان و مُحَبَتِ
ایماندارای تَسالونیکي شنیده، خُدا ره شکرگزاری مونه و دَ یادِ
ازوا میره که او دَ مینکل ازوا چی رقم زندگی مُوکد. پولس
شوق و علاقه خُو ره بلده دُباره دیدون ازوا اظهار مونه و اونا
ره نصیحت مونه که زندگی پاک و مُقدَّس دَشته بشه. بعد ازو
دَ سوالهای که دَ باره پس آمدون مسیح و دَ باره ایماندارای
فوت شُده دَ مینکل ازوا پیدا شُد، جواب میدیه و دَ باره ازی
که مسیح چی وخت و چی رقم پس مییه و قد ایماندارای فوت
شُده دَ وختِ آمدونِ مسیح چیز کار موشه بلده ازوا بیان
مُکنه.

فهرستِ عنوانها

سلام ها (فصل ۱: آیه ۱)

شکرگزاری و دُعا (۲:۱)

خدمتای پولس د ایماندارای تسالونیکي (۱:۲)

خبرِ خوش و دلگرم کُننده تیموتائوس (۶:۳)

زندگی مطابقِ خاستِ خدا (۱:۴)

ظهورِ مسیح (۱۳:۴)

تیارى بلده ظهورِ مسیح (۱:۵)

نصیحت های آخری (۱۲:۵)

سلام ها

۱ از طرفِ پولس، سلوانس و تیموتائوس، تقدیم د جماعتِ ایماندارای شارِ تسالونیکي که د آته مو خدا و د مولا عیسیٰ مسیح تعلق دَرید: فیض و سلامتی نصیب شمو شنه!

شکرگزاری و دُعا

۲ مو همیشه خدا ره بلده پگ شمو شکر-و-سپاس مَوگی. د
دُعای خُو هر وخت شمو ره ذکر کده^۳ اعمالِ پُر ایمان، کارِ پُر

مِهْر-و-مُحَبَّت و اُمِيد اُسْتَوَارِ شُمُو رِه دَ مَوْلایِ مَو عِيسَى
 مَسِيح، دَ حُضُورِ آتِه مَو خُدا ياد مُونی. ^۴ آي بَرارو، مَو مِيدَنی
 کِه خُدا شُمُو رِه دُوست دَرِه و شُمُو رِه بَلدِه مَقصد خُو اِنْتِخاب
 کدِه، ^۵ چُون زَمانی کِه مَو خوشخبری رِه دَز شُمُو اِعلان کدی،
 تَنها لَفْطی اُو رِه نَگفتی، بَلکِه دَ قُدْرَتِ مُعْجَزِه ها و رُوح
 اَلْقُدْس و دَ يَقِين-و-اِطْمِينانِ کَامِل اُو رِه دَز شُمُو رَسَندي. شُمُو
 دِيديد کِه مَو دَ بَيْن شُمُو چَطُور رُوبِه-و-رِفْتار مَو کدی و چِيقَس
 دَ فِکَر شُمُو بُوْدی. ^۶ شُمُو از مَو سَرْمَشَق گِرِفْتِيد و از مَوْلَا
 پِیروي کَدِيد و اِگرچِه از خَاطِرِ پِیغامِ خُدا رَنج کَلو دِيديد، و لِه
 باز اَم شُمُو اُو رِه دَ خُوشی کِه رُوح اَلْقُدْس مِيدِيه قَبُول کَدِيد.
^۷ دَمزِي رَقْم شُمُو بَلدِه پَگ اِيماندارا دَ مَنطِقِه ها ي مَقْدونِيه و
 اَخِيَا يِگ اَلْگُو جُور شُدِيد. ^۸ اَلی کَلَام مَوْلَا تَوَسُطِ از شُمُو نَه
 تَنها دَ مَقْدونِيه و دَ اَخِيَا پَخَش شُدِه، بَلکِه توره ها دَ بارِه اِيمان
 شُمُو دَ خُدا، دَ تَمَامِ جاي ها دَ گُوشِ مَرْدُم رَسِيدِه. پَس لَازِم
 نِيبِه کِه مَو يِگُو چِيز بُگي، ^۹ چِراکِه مَرْدُم اَمزُو جاي ها خُودون
 شِي شَاهِدِي مِيدِيه کِه شُمُو چي رَقْم قَد اَز مَو خُوشامد-و-
 پِيشامد کَدِيد و دَ چي نِيتِ پَاک اَز بُت پَرستِي دِست کَشِيدِه
 سُون خُدا ي زِنْدِه و حَقِيقِي رُوي اُورْدِيد تا دَزُو خِدْمَت کَنِيد،
^{۱۰} و دَ چي شُوقِ کَلو مُنْتَظِرِ ظُهُورِ باچِه اَزُو يَعْنِي مَوْلَا عِيسَى،

از عالمِ باله اَسْتِيد. خُدا اُو ره دُوباره زنده كد و اُو مو ره از
غَضَبِ آخِرَت نجات مِيديه.

خِدْمَتای پوْلُس دَ ایماندارای تِسالونیکِی

۲ برارونِ عزیز، خودون شُمو خبر دَرید که اَمَدونِ ازمو دَ
پیش شُمو بے فایده نَبُود. ^۲ شُمو مِيدَنید که مو دَ شارِ فیلِیپی
رَنج دیدی و چِیقس مرَدُم قد ازمو بَد رَفَتاری کد. لیکن باو جُودِ
امزی مُخَالَفَتِ های سخت، خُدا دَز مو جُرأت دَد تا که
خوشخبری خُدا ره دَز شُمو بَر سَنی. ^۳ نَصِيحَتِ-و-تَشْوِیْقِ ازمو
نَه از گُمراهی بُوَد و نَه دَ نِیَتِ ناپاک و نَه ام دَ فَرِیبِ دَز شُمو
رَسید. ^۴ بَر عکس، خُدا از مو راضی شُد و اِعلانِ کدوِنِ
خوشخبری ره دَ عَهْدِه ازمو اِیشت. و مو دَ ای مقصد
خوشخبری ره اِعلانِ نَکدی که مرَدُم از مو راضی شَنه، بَلِکِه
مو رضایَتِ خُدا ره میخاهی، چُون خُدا از تمامِ نِیَتِ دِلِ های مو
خبر دَره. ^۵ شُمو مِيدَنید که مو هیچ وخت کوششِ نَکدی که قد
زِیونِ لَخْشُمِ شُمو ره جَلبِ کنی و نَه ام از خاطرِ کُدَمِ منافعِ
شخصی دَ دِیرِ شُمو اَمَدی؛ خُدا دَزی باره شَاهِدِ اَسْتِه. ^۶ مو از
مرَدُمِ اِحْتِرَامِ-و-بُزُرگیِ نَخاستی، نَه از خودِ شُمو و نَه از کسِ

ديگه، اگرچه بحیثِ رسولای مسیح مو امی حق بزرگی ره د
 بله شمو دشتی. ^۷ لیکن مو قد شمو د نرمی-و-ملايتم رفتار
 کدی، مثل یگ ابه مهربو که از نلغه گون خو آبیله مونه.
^۸ محبت-و-علاقه ازمو د باره شمو تا امزو حد بود که نه تنها
 پیغام خدا ره دز شمو اعلان کدی، بلکه حتی زندگی خو ره ام
 د اختیار شمو ایشتی، چراکه شمو اموقس دز مو عزیز بودید.
^۹ برارو، مشتقت و سختی های ره که مو دیدی حتماً از یاد شمو
 نرفته بشه: شاو و روز مو زحمت کشیده بلده تهیه معاش خو
 کار موکدی تاکه از خاطر رسندون پیغام خدا سربار یگون شمو
 نشنی. ^{۱۰} و شمو، آی ایماندارا، شاهد استید که د چی پاکي و
 د چی عدالت و خلوص نیت قد شمو رفتار موکدی و خدا خود
 شی ام دزی باره شاهد استه. ^{۱۱} امچنان شمو میدنید که مو قد
 هر کدم از شمو امو رقم رفتار موکدی، که یگ آته قد
 بچکیچای خو رفتار مونه: ^{۱۲} مو شمو ره نصیحت موکدی،
 دلداری میددی و شمو ره شله موشدی تاکه رفتار شمو قابل
 قبول خدا بشه، چون او شمو ره د پادشاهی و جلال خو دعوت
 مونه.

^{۱۳} و ازی دلیل ام مو دایم خدا ره شکر مونی، چون وختیکه

پیغامِ خُدا ره دَز شُمو اِعلانِ کدی، شُمو که اُو ره از دانِ اِزمو
 شِنیدید، اُو ره توره اِنسانی فِکر نَکدید، بَلکه اُو ره دَ عِنوانِ
 کلامِ خُدا قَبولِ کدید که واقِعاً کلامِ اِزوا ام آسته و دَ زِندگی
 شُمو که ایماندار اَسْتید کار مونه. ^{۱۴} اِی برارو، شُمو از
 جماعتِ های ایماندارای خُدا که دَ مُلکِ یهودیه آسته، تَقْلیدِ
 کُننده شُدید، یعنی اُمو رَنج-و-سختی های که اونا از خاطرِ
 ایمان خُو دَ عیسیٰ مَسیح از وطندارای یهودی خُو دید، شُمو ام
 از دِستِ وطندارای خودون خُو دیدید. ^{۱۵} مولا عیسیٰ و اَنبیا ره
 یهودیا کُشت و آلی اونا مو ره ام آزار-و-اَذیت مونه. خُدا ازوا
 خوش نییه و اونا مُخالِفِ پَگِ مَرْدَمِ آسته ^{۱۶} و کوششِ مونه مو
 ره از رَسندونِ پیغامِ خُدا که باعثِ نِجاتِ مَرْدَمِ غَیرِ یهود
 موشه، مَنعِ کنه. دَزی رِقَمِ بارِ گُناهِ های ازوا گِرَنگتر شُدِه
 موره و دَ آخِرِ غَضَبِ خُدا دَ بِلِه ازوا نازلِ موشه.

^{۱۷} برارونِ عزیز، بعد اِزوا که یگِ مَدَتِ ره از شُمو دُور شُدی،
 اِگرچه دِلِ مو از شُمو دُور نَبود، مو دُوچند زیادتر دَ اِی آرزو
 بُودی و کلو کوششِ مَوکدی که رُوی شُمو ره بَسَمِ بِنگری.
^{۱۸} مو میخاستی که دَ پِیشِ شُمو بییی و مَخْصُوصاً خود مه،
 پوُلَس، بارها کوششِ کَدَمِ که دَ دِیرِ شُمو بییم، لیکن شَیطو مو

ره نه ايشته. ^{۱۹} اُمید و خوشی و تاجِ افتخارِ ازمو چی آسته؟ آیا شُمو نیستید که دَ وختِ ظُهورِ مولا عیسیٰ دَ حُضورِ ازو باعثِ سربلندی ازمو موشید؟ ^{۲۰} آره، شُمو افتخارات و خوشی ازمو آستید.

۳ ^۱ آخِرکار که دیگه تَحْمَلِ نَتِنستی از شُمو بے خبر بشی، اوخته تصمیمِ گِرفتی که مو تنهای خُو دَ شارِ آتِن بُمَنی ^۲ و تیموتائوس ره دَ دِیرِ از شُمو ریی کدی. او یگ برارِ ایماندار و یگ همکارِ ازمو دَ راهِ خُدا و دَ پَخش کدونِ خوشخبری مسیح آسته. او ره دَ پیشِ شُمو ریی کدی تاکه او شُمو ره دَ ایمان تشویق کنه و دَ ز شُمو دِلداری بَدیه ^۳ تا هیچ کُدم شُمو دَ اثرِ امزی رَنج-ها-و-زَحمت ها دِلسرد نَشْنید، چُون شُمو خُوب خبر دَرید که مو بلده امزی مقصد مَقَرَر شُدی که رَنج-و-زَحمت پَنگری. ^۴ راستی، زمانیکه مو قد شُمو بُوَدی، پیش از پیش دَ ز شُمو گُفتدی که رَنج-و-آزار دَ اِنْتَظارِ شُمو آسته؛ و شُمو مِیدَنید که واقعا امی رقم شُد. ^۵ امزی خاطر وختیکه طاقت ازی ره نَدشتم که دیرتر از شُمو بے خبر بشم، اوخته یگو کس ره دَ پیشِ شُمو ریی کُدم تاکه او از اُسْتواری ایمان شُمو اِطمینان حاصل کنه. ما ترس خوردُم که شیطو شُمو ره و سوسه کده

بَشَه و تمام زَحمتای مو از بَین رفته بَشَه.

خبرِ خوش و دِلگرم کُننده تيموتائوس

ليکن آلی تيموتائوس از پيش شُمو پس دَ دِيرِ ازمو آمده و دَ باره ايمان و مُحَبَّت شُمو دَز مو خبرِ خوش آورده که شُمو هر غَيت مو ره ياد مُونيد و دَ شوقِ ديدارِ مو اَسْتيد، دَمزُو اندازه که مو ام دَ آرزوی ديدارِ از شُمو اَسْتی. ^۷ پس آی برارو، باوجودِ ازی که مو دُچارِ پَریشانی و مُصِيبَت اَسْتی، ليکن از شَنِيدو دَ باره ايمان شُمو تَسَلی پيدا کدی و آسوده شُدی. ^۸ و آلی که شُمو دَ خُداوند اَسْتوار اَسْتيد، زندگی ازمو تازه مُوشه.

^۹ نَمُوفامُ، قد چيزخيل مو مِيتنی از خُدا شُکرگُزاري کنی بخاطرِ پگِ امزی خوشی که دَ باره از شُمو دَ پيشگاهِ خُدا احساسِ مُونی. ^{۱۰} ليکن شاو و روز دَ شوقِ کَلو دُعا مُونی و از خُدا طلبگار اَسْتی که بسمِ رُوی شُمو ره بَنگري و هر رقم کَمبُودی ايمان شُمو ره پُوره کنی.

^{۱۱} مو دُعا مُونی که آتِه مو خُدا خود شی و مَولای مو عيسی، راه ره بسمِ بلده ازمو واز کُنه تا دَ دِيرِ شُمو بيی ^{۱۲} و دُعا مُونی که مَولا مَهر-و-مُحَبَّت شُمو ره بلده يگدِيگِه شُمو و بلده

پگِ مردُم کلو کنه، اُمُو رقم که مُحَبَّتِ ازمو بَلَدِه شُمُو کلو
آسته. ^{۱۳} اُو دَ وَسِيْلَه مِهْر-و-مُحَبَّتِ دِل هَاي شُمُو رِه قَوِي کنه
تا دَ امزُو رُوژِ که مَوْلَاي مَوْ عِيْسِي قَدْ مُقَدَّسِيْن خُو دُوْبَارِه
ظُهُوْر مُونِه، شُمُو دَ نَظَرِ آتِه مَوْ خُدا پَاک و بے عَيْب بَشِيْد.

زندگی مُطَابِقِ خَاسْتِ خُدا

^{۱۴} دَ آخِر، اَي بَرَارُو، شُمُو اَز مَوْ يَادِ گِرَفْتِيْدِ که چَطُوْر بَايْد
رِفْتَارِ کُنِيْدِ تا که خُدا اَز شُمُو خُوْشَنُوْدِ بَشِه و شُمُو اُمُو رِقْمِ اَم
زِنْدَگِي مُونِيْدِ. اَلِي مَوْ دَ نَامِ مَوْلَا عِيْسِي دَ پِيْشِ شُمُو زَارِي
مُونِي و دَزِ شُمُو تَاکِيْدِ مُونِي که اَزِي کَدِه اَم کَلُوْتَرِ کُوْشِشِ
کُنِيْدِ. ^۲ چُوْنِ اُمُو اَحْکَامِ رِه که مَوْ اَزِ طَرَفِ مَوْلَا عِيْسِي دَزِ
شُمُو دَدِي، پِگِ شُمُو مُوْفَامِيْدِ. ^۳ خَاسْتِ-و-اِرَادِهِ خُدا مُقَدَّسِ
شُدُوْنِ شُمُو آسْتِه، يِعْنِي اَزِ هَرِ رِقْمِ فِسَادِ اِخْلَاقِي و زِنَاکَارِي
خُوْدِ رِه دُوْرِ نِگَاهِ کُنِيْدِ. ^۴ هَرِ کُدَمِ شُمُو بَايْدِ بُوْفَامِيْدِ که جِسْمِ خُو
رِه چِي رِقْمِ اِدَارِهِ کُنِيْدِ و اُو رِه دَ پَاکِي و عِزْتِ نِگَاهِ کُنِيْدِ ^۵ و
رِقْمِ مَرْدُمِ خُدا نَاشِنَاسِ اَلِي بِنْدِه شَهْوَتِ و هَوَسِ هَا نَبَشِيْدِ.
^۶ هِيْچِ کَسِ نَبَايْدِ دَ حَقِ يِگِ بَرَارِ خُو تَجَاوُزِ کِنِه و نَه اَم دَزِي
بَارِه کَسِ رِه بَازِي بَدِيِه، چِرَاکِه خُداوْنِدِ اَزِ پِگِ اَمزِي کَارَا اِنْتِقَامِ

میگیره. ای تورا ره مو از گاه دز شمو گُفتدی و تاکید کُدی.

^۷خدا مو ره بلده ازی اِنْتِخاب نَکده که مو د ناپاکی زندگی کنی، بلکه برای ازی که پاک و مُقَدَّس بشی. ^۸پس کسی که امی نصیحت ره رد مونه، او شخص نه انسان ره، بلکه خُداي ره اِنکار مونه که روح اَلْقُدس خُو ره دز شمو میدیه.

^۹د باره مُحَبَّت د بَين برارو لازم نیسته که دز شمو یگو چیز نوشته کنم، چُون خودون شمو از خُدا یاد گِرِفْتِید که چی رقم باید قد یگدیگه خُو مُحَبَّت دشته بشید. ^{۱۰}شک نییه که شمو د تمام ولایتِ مَقْدونیه قد پگ برارو امی رقم رفتار مونیید. ولے باز ام، ای برارو، از شمو خاهش مونم که مُحَبَّت شمو ازی کده ام کلوتر شنه ^{۱۱} و هَدَف شمو اینمی بشه که یگ زندگی آرام دشته بشید. د کارای خودون خُو مَشغُول بشید و قد دِستای خُو زَحمت کشیده خَرچ های زندگی خُو ره پیدا کنید، امو رقم که ازی پیش دز شمو امر کُدی، ^{۱۲}تاکه شمو د نظرِ غَیرِ مَسِیحی ها اِعْتِماد پیدا کنید و د هیچ چیز مُحْتَاج نَبَشِید.

^{۱۳} برارو، ما میخایم که شمو از وضعیتِ ایماندارای که فوت کده، با خبر بشید تا شمو مثلِ کسای که امیدِ زندگی ابدی ندره، غم و کوٹیو نکنید. ^{۱۴} چون مو ایمان دری که عیسیٰ مُرد و بعد از مرگ دوباره زنده شد و ام یقین دری که د وختِ پس آمدونِ ازو، خدا تمامِ ایماندارا ره که مُرده، قد مسیح قتی پس میره. ^{۱۵} و اینمی توره ره مو از کلامِ مولا موگی: یعنی مو که زنده آستی و تا روزِ ظهورِ مولا باقی مومنی از مُرده ها کده پیشتر د حضورِ ازو نمیرسی. ^{۱۶} چون مولا خود شی د آوازِ بلند و د صدایِ ملایکه اعظم و د صوتِ شیپور از آسمو نازل موشه و اول کسای که د مسیح ایمان دشت و فوت کدد، اونا دوباره زنده موشه. ^{۱۷} بعد ازو، مو که تا هنوز زنده آستی قد ازوا قتی سون اورها و طرفِ عالمِ باله برده موشی و قد مولا یگ جای شده تا ابد قد ازو مومنی. ^{۱۸} پس قد امزی توره ها یگدیگه خو ره تشویق کنید و دلداری بدید.

تیاری بلده ظهورِ مسیح

۵ برارونِ عزیز، دَ باره وخت و زمانِ امزی واقعہ ہا لازم

نیہہ کہ یگو چیز بلده شمو نوشته کنم،^۲ چون شمو خوب

میدنید کہ روزِ خداوند رقمِ دُزی آسته کہ دَ غیتِ شاو میہہ.^۳ دَ

امزو وخت کہ مردم موگه: ”صلح و امنیت آسته،“ بے بلغه

مُصیبت، خرابی و ویرانی دامونگیرِ مردم موشه مثلِ کہ درد

زیدو دَ سراغِ خاتونِ شکامتو میہہ و هیچ راه بلده دوتا کدو

نیہہ.^۴ لیکن شمو، آی برارو، دَ تریکی نیستید کہ او روز شمو

ره رقمِ یگ دُزِ غافلگیر کنه،^۵ چون شمو بچکیچای نور و روز

آستید. مو نه دَ تریکی کارِ دری و نه دَ شاو.^۶ پس، بیید کہ

رقمِ دیگر و وری خاورده نبشی، بلکه بیدار و آدر بشی.^۷ چون

کسای کہ خاو مونه، اونا شاو دَ خاو موره و کسای کہ خود ره

نشہ مونه اونا ام از طرفِ شاو نشہ موکنه.^۸ ولے مو کہ دَ

روشنیی روز تعلقِ دری، باید آدر بشی و ایمان و محبتِ خو ره

مثلِ زره وری دَ جانِ خو کنی و امیدِ نجات ره رقمِ کوله آینی

وری دَ سرِ خو کنی.^۹ چون خدا مو ره بلده ازی انتخاب نکرده

تا دَ غضبِ ازو گرفتار شنی، بلکه برای ازی کہ دَ وسیله

مولای مو عیسیٰ مسیح نجات پیدا کنی.^{۱۰} او جانِ خو ره

بلده ازمو فدا کد تاکه مو دَ وختِ ظُهور شی قد ازو قتی

زندگی کنی، چی بیدار بشی، چی خاو.^{۱۱} پس دُزی ترتیب دَ

تَشْوِيق و تَقْوِيه يِگدِيگِه خُو اِدَامه بَدِيد، اَمُو رَقْم که آلی ام
مُوکْنِيد .

نصِيحَت های آخِرِي

- ^{۱۲} اَکُو بَرارو، مو از شُمو خَاهِش مُونِي تا اَمُو کَسای رِه که دَ
بِين شُمو دَ نَامِ مَولا عِيسِي زَحْمَت مِيکَشه و شُمو رِه دَ رَاهِ
مَولا نَصِيحَت و رَاهنُمَايِي مُونِه، دَ عِنَوَانِ پِيشوَايُون خُو شِنَخْتِه
دَزوَا اِحْتِرَام کُنِيد ^{۱۳} و اُونَا رِه از خَاطِرِ اَمْرُو زَحْمَت هَا قَد جَان و
دِل خُو مُحَبَت و عِزَت کُنِيد و قَد يِگدِيگِه خُو دَ صُلح-و-صَفَا
زِنْدَگِي کُنِيد. ^{۱۴} بَرارو، مو از شُمو خَاهِش مُونِي که آدْمَايِ
تُمبِل و جُورِبَعَل رِه سِرزَنَش کُنِيد، اَفْرَادِ کَم دِل و تَرَسَنْدُک رِه
دِلدَارِي بَدِيد، از نَفْرَايِ ضَعِيف و کَم وَس پُشْتِيوَانِي کُنِيد و قَد
پِگِ مَرْدُم صَبْر-و-خَوَصِلَه کُنِيد. ^{۱۵} هُوش کُنِيد که دَ عِوَضِ
بَدِي، بَدِي نَکُنِيد، بَلْکِه هَمِيشِه کُوشِش کُنِيد که قَد يِگدِيگِه
خُو و ام قَد تَمَامِ مَرْدُمِ دِيگِه خُوبِي کُنِيد. ^{۱۶} هَر غِيَت خُوش
بَشِيد. ^{۱۷} هَمِيشِه دُعا کُنِيد. ^{۱۸} دَ هَر حَالَتِ که اَسْتِيد، از خُدا
شُکْرگُزَارِي کُنِيد، چَرَاکِه اَيْنِمِي خَاسْت-و-اِرَادِه خُدا بَلَدِه شُمو دَ
رَاهِ عِيسِي مَسِيحِ اَسْتِه. ^{۱۹} اَتَشِ رُوحِ اَلْقُدَسِ رِه گُل نَکُنِيد.
^{۲۰} پِيشگُويِي هَا رِه سُبُک-و-اَنْدَک فِکْر نَکُنِيد، ^{۲۱} مِگَم دَ بَارِه

تمام چیزا تحقیق کنید و هر چیزی خوب ره محکم بگیریډ.

^{۲۲} خودون خو ره از هر رقم بدی دور نگاه کنید.

^{۲۳} خدای که سرچشمه صلح-و-سلامتی آسته، خود شی شمو ره

کاملأ پاک-و-مُقَدَّس کنه تاکه روح و جان و جسم شمو تا روز

ظهورِ مَولایِ مو عیسیٰ مسیح، بے عیب و سالم بُمَنه. ^{۲۴} امو

که شمو ره دعوت دده قابلِ اعتماد و باوفا آسته و حتماً امی

کارا ره پوره مونه.

^{۲۵} برارو، د حق ازمو دُعا کنید. ^{۲۶} پگ برارو ره از دل پاک قد

رُوی ماخی سلام بُوگید. ^{۲۷} ما د نامِ مَولایِ شمو ره قسم میدم که

امی خط ره د تمام برارو بخانید.

^{۲۸} فیضِ مَولایِ مو عیسیٰ مسیح نصیبِ پگ شمو شنه. آمین.